



15
769
PB-85

Bosnia and Herzegovina
Federation of Bosnia and Herzegovina

CANTON SARAJEVO
Ministry for Science, Higher Education and Youth

Broj: 27-01-04-8156-12.1/23
Sarajevo, 12.4.2023. godine

SKUPŠTINA KANTONA SARAJEVO
n/r Elvedin Okerić, predsjedavajući

PREDMET: Odgovor na zastupničko pitanje zastupnika u Skupštini Kantona Sarajevo
Damira Marjanovića, **dostavlja se**
VEZA: *Vaš akt broj:* 01-04-8156-12/23 od 29.03.2023.godine

Na 6. Radnoj sjednici Skupštine Kantona Sarajevo održanoj dana 29.03.2023. godine, u okviru tačke Dnevnog reda „Poslanička/zastupnička pitanja, inicijative i odgovori“, a u skladu sa čl. 211. i 214. Poslovnika Skupštine Kantona Sarajevo, zastupnik u Skupštini Kantona Sarajevo Damir Marjanović, postavio je zastupničko pitanje:

„Kako mislite riješiti problem finansiranja višegodišnjih naučnoistraživačkih projekata bez korištenja UNDP servisa?“

ODGOVOR

Vlada Kantona Sarajevo putem Ministarstva za nauku, visoko obrazovanje i mlade Kantona Sarajevo je proteklih godina u značajnoj mjeri povećala budžet za ulaganja u razvoj naučnoistraživačke i umjetničkoistraživačke djelatnosti, kao put ka dostizanju cilja od ulaganja 2% BDP u nauku a što predstavlja europski prosjek.

Povećan obim ulaganja polučio je značajna unapređenja naučnoistraživačke djelatnosti u smislu nabavke najsavremenije i sofisticirane opreme i infrastrukture za obrazovne i naučne institucije u Kantonu Sarajevo, povećanja naučne produkcije, usavršavanja naučnoistraživačkog i umjetničkoistraživačkog osoblja putem provođenja programa podrške naučnistraživačkoj djelatnosti.

Sa povećanjem ulaganja sredstava u naučnoistraživačke, istraživačkorazvojne i umjetničkoistraživačke projekte i djelatnosti u Kantonu Sarajevo povećali su se izazovi sa kojima se susreću prvenstveno institucije koje se nalaze u trezorskom sistemu poslovanja (Univerzitet u Sarajevu) prilikom provođenja postupaka javnih nabavki i realizacijom dodjeljenih sredstava zbog važećih zakona o javnim nabavkama te zakonskih procedura kada je u pitanju realizacija Budžeta Kantona Sarajevo.

Praksa pokazuje da je dosadašnji način utoška predviđenih sredstava iz Budžeta Kantona Sarajevo za sufinansiranje naučnoistraživačkih projekata aktivnost koju je vrlo teško praktično realizovati u javnim institucijama u jednoj godini. Ministarstvo je nakon analize dvogodišnjeg provođenja programa sufinansiranja naučnoistraživačkih projekata i procesa koji prate program, stava da je potrebno definisati dugoročno, kvalitetno i stabilno rješenje za sufinansiranje višegodišnjih naučnih projekata.

Analizom iskustava zemalja u regiji i šire vidljivo je da je ovaj problem potrebno rješavati tako se da naučnoistraživačke i umjetničkoistraživačke djelatnosti finansiraju kroz centralno tijelo



(fond, agencija, savjet ili neki drugi oblik organizacije) koje kroz transparentne javne pozive podržavati razvoj nauke, pogotovo naučnu izvrsnost.

Intencija Ministarstva za nauku, visoko obrazovanje je da strateškim dokumentima čija je izrada u toku (Strategija za razvoj nauke Kantona Sarajevo, Izmjene i dopune Zakona o naučnoistraživačkoj djelatnosti) ponudi rješenja finansiranja naučnoistraživačkih projekata kroz uspostavljanje Fonda za nauku Kantona Sarajevo sa ciljem efikasnijeg utroška sredstava za naučnoistraživačke i umjetničkoistraživačke djelatnosti.

Cijenimo da bi osnivanje Fonda za nauku imalo mnogostruke pozitivne efekte a koje, između ostalog obuhvataju sljedeće:

- strateški ciljevi razvoja nauke Kantona Sarajevo bi bili usaglašeni sa ciljevima Evropske unije;
- sredstva bila dostupna u vremenskom rasponu potrebnom za realizaciju višegodišnjih projekata;
- praćenje realizacije projekata i utroška sredstva bilo bi transparentnije, digitalizacija informacionog sistema značajnog za naučnoistraživačku i umjetničkoistraživačku djelatnost bila bi koordinirana i dostupna (oprema, kapaciteti i ljudski resursi);
- omogućavanje veće fleksibilnosti u finansiranju naučnih projekata, kao i bolju prilagođenost potrebama i prioritetima naučne zajednice;
- pružanje podrške razvoju novih naučnih oblasti i multidisciplinarnih projekata koji su ključni za rješavanje kompleksnih problema a zahtijevaju projekte koji nisu ograničeni na jednogodišnji period;
- unapređenje mreže istraživača sa privrednim/industrijskim partnerima, što bi dovelo do razvoja novih tehnologija i proizvoda a te aktivnosti bi mogle da utiču na ekonomski rast, stvarajući nove poslove i povećavajući konkurentnost.

Takođe, Fond za nauku bi mogao da pruži više prilika za obuku i mentorstvo mladih naučnika, povećavajući na taj način nivo stručnosti u ovoj oblasti. To bi moglo da dovede do veće inovativnosti i boljih rezultata u naučnom istraživanju, što bi u konačnici dovelo do povećanja kvaliteta života u društvu. Dakle, osnivanje Fonda za nauku bi pružilo više mogućnosti za inovativna i napredna naučna istraživanja i poboljšanje stanja u oblasti nauke i tehnologije.

Fond za nauku, bi omogućio i iznalaženje dodatnih sredstava za podršku naučnoistraživačkoj i umjetničkoistraživačkoj djelatnosti iz drugih izvora finansiranja a ne samo kroz Budžet Kantona Sarajevo, razvija partnerstava naučnih i istraživačkih organizacija sa drugim organizacijama, poput kompanija, fondacija ili drugih organizacija, kako bi zajednički finansirali projekte nauke. Ovi koraci mogu pomoći u poboljšanju finansiranja naučnih projekata i programa i osigurati da se ulaganje u nauku i istraživanje sprovodi na način koji će obezbediti najveću korist za društvo.

Dostaviti:

1. Naslovu
2. Služba za skupštinske poslove
3. Stručna služba Vlade Kantona Sarajevo
4. Zastupnik Damir Marjanović

Pripremila: Mr. sci Azemina Njuhović,
Pomoćnica za nauku
Sekretarka: Belma Trajkov

